


DIE HÄND D WÄLT UFF EM HOLZWÄG



Dr Jogger Hans schreyt: «Allerhand!
Was sell denn do das Absperrband?»
Au d Trudi uss em Gundeli
Merggt mit em glaine Hundeli
S gyt hytte do kai Rundeli
Fir s dääglic Fiffi-Pfundeli
So kunnt s as baid an sällem Daag
Entgaischt'ret keere vor em Haag
Und äänedraa isch gspängschtig Rueh
Denn dr Hardwald, dä isch jetz zue

Dr Hans und d Trudi dien verzelle
As me d Naduur het bsueche welle
Doch die wurd, s däät e kain verstoo
Daagdääglic ihri Fääd're loo
Will s z warm isch, sait me, ganz verruggt
Het s drum dr Wald bref zämmedruggt
Duet mit Säägi, Axt und Bolze
Baum um Baum jetz aabelholze
Z Oobe isch denn gspängschtig Rueh
Und au morn blybt alles zue

Dr Hans und d Trudi sueche halt
Fir ihri Hobbys neye Wald
Ass sy greffdig Zyt dien spaare
Wird dr Kaare ummegfahre
Parggblatz muesch do kaine sueche
SUV stellsch under d Bueche
D Abgaas bloosisch no ganz ruuch
In dr näggschti Holderstruuch
Druggsch s Gaspedaal – und denn isch Rueh
Die letschte Veegel luege zue

A propos Veegel, Igel, Reh
Me wurd dr Muulwurf kuum me gsee
Es duet im Egge, ganz im Stille
Dr Maischter Lambbe d Lambbe fille
S beschäftigt s Immeli, dr Schnoog
In erschter Linie d Greetlifroog:
Wird nur g'reedet, wird nid g'handlet?
Merggt niemer, ass sich s Klima wand'let?
S dien d Bier bym wyssi Fahne schwängge
Mit Wehmuet zrugge an d Arche dängge
Dr Hans und d Trudi luege zue
Und bloche wyter – ganz in Rueh

Eb Hans, eb Trudi, baid zem Drutz
Pfyffe n uff e Klimaschutz
Dien fir schlabbi 100 Frangge
Mool um Mool dr Kaare tangge
Um mit Alu-Gummi-Fingge
Gschwind in Rom e Kaffi z dringge
Und me losst sich s au nid näh
Denn z Midaag fir 15.10
Kurz uff London uff z fliege
Zem e Teeli uffdischt z griege
Und zrugge deheim am glyche n Oobe
Duet sich dr Hans als «offe» loobe
D Ferie buecht är letschtemänd
Uff dr Wält am and're n Änd
Dert vor Ort muess är erkenne
Groossi Dail dien aabebrenne
S Trudi luegt bedroffe zue
Fäärnsee ab – und scho isch Rueh

Uss de Fuege merggsch, wo s glemmt
Als wie meh wird yberschwemmt
E Fyyrwärgg duet zem ebbis fyyre
Im Himmel Fyynstaub broduziere
Und bis hyt isch s nooni gschafft
Z haize ohni Kohlegrafft
Will z Asie d Waare billig sinn
Liggt sicher au e Schiffsrais dinn
Und isch me vo dr Rais denn zrugge
Blybt nur e ryysig Fuessabdrugg
E Hufte bringt s nid uss dr Rueh
Doch lang luegt do d Naduur nimm zue

Australie – letschtlig wyt ewägg
Au s Meer mit all dämm Blasdiggdreagg
Und uff Blatz ains wältwyt elai
Isch China mit em CO₂
Dr Jogger Hans steert sich nid dra:
«Sch'nid my Brobleem – s goot sälli aa.»
Är findet s Gschwätz nid vo Bidyttig
Und hoolt dr Schlüssel sälle Frytig
Zem syyni baide Goofe n ebbe
Mit 4x4 zer Demo z schlebbe
Dernoo stoot Sport uff sym Brogramm
Dr Hans brämst ab, stoot bletzlig stramm
Und dänggt sich: «Wirgglig allerhand!»
S isch alls no do, das Absperrband
S kunnt im Hardwald halt s Eländ fyyre
Nid wyt ewägg, nai – vor dr Dyyre.